

## KO E TOHI FAKAMUA A MOSE

# KO E KENESE.

### KO E VEVEHEAGA I.

*Ko e foafoaga he lagi mo e lalolagi.*

**N**E eke he Atua e lagi mo e lalolagi ke he kamataaga.

2 Na toka noa e lalolagi mo e teao, na *ufufu* foki e moana he pouli; ne gahuahua foki e Agaga he Atua ki luga he fuga vai.

3 Ne pehe mai e Atua, Kia maama; ti maama ai ni.

4 Ti kitekite e Atua ke he maama, kua mitaki; ti vevehe ai he Atua e maama mo e pouli.

5 Ti ui he Atua e maama, Ko e aho; ka e ui e ia e pouli, Ko e po. Ko e afiafi mo e pogipogi ko e aho fakamua haia.

6 ¶ Ne pehe mai e Atua, Kia ha he vaha he tau vai e lagi likoliko, ke eke mo veveheaga he falu a vai mo e falu a vai.

7 Ne eke he Atua e lagi likoliko, kua vevehe aki e tau vai i lalo he lagi likoliko mo e tau vai i luga he lagi likoliko; ti pihia ni.

8 Ti ui he Atua e lagi likoliko, Ko e lagi. Ko e afiafi mo e pogipogi ko e aho ua haia.

9 ¶ Ne pehe mai e Atua, Kia fakapotopoto ke he mena taha e tau vai i lalo he lagi, kia kitia foki e mena momo; ti pihia ni.

10 Ti ui he Atua e mena momo, Ko e kekele; ka e ui e ia e fakapotopotoaga he tau vai, Ko e tahi; ti kitekite e Atua ki ai kua mitaki.

11 Ne pehe mai e Atua, Kia tupu mai he kekele e tau lau kou, mo e akau tote ke tupu mo e hana fua, mo e akau fua ke kai ke fua mai takitaha mo e hana fua, ha ia ia ni hana tega ke he lalolagi; ti pihia ni.

12 Ti tupu mai he kekele e tau lau kou, ko e akau tote ke fua mai, takitaha mo e hana fua, mo e akau fua ke kai, ha ia ia ni hana tega, takitaha mo e hana fua; ti kitekite e Atua ki ai kua mitaki.

13 Ko e afiafi mo e pogipogi ko e aho tolu haia.

14 ¶ Ne pehe mai e Atua, Kia ha ha he vaha likoliko he lagi e tau mena ke fakamaama aki, ke katofia ai e aho mo e po; kia eke foki mo tau fakamailoga, mo tau vaha, mo tau aho, mo tau tau.

15 Kia eke foki mo tau mena ke fakamaama aki ke he vaha likoliko he lagi, ke fakamaama aki e lalolagi; ti pihia ni.

16 Ti eke ai he Atua e na maama lalahi ua; ko e maama lahi ke pule ke he aho, ka ko e maama tote ke pule ke he po; *ne eke foki e ia e tau fetu.*

17 Ne tuku ai he Atua ke he vaha likoliko he lagi, ke fakamaama aki e lalolagi;

18 Ke pule foki ke he aho mo e po, mo e katofia e maama mo e pouli; ti kitekite e Atua ki ai kua mitaki.

19 Ko e afiafi mo e pogipogi ko e aho fa haia.

20 Ne pehe mai e Atua, Kia pa loga mai he vai e tau mena momoui ke totolo; kia lele foki e tau manu lele ki luga he kekeleke, ke he vaha likoliko he lagi.

21 Ne eke foki he Atua e tau tanimo lalahi, mo e tau mena momoui oti kua totolo, ne pa loga mai he vai, takitaha mo e hana kakano, mo e tau manu lele oti takitaha mo e hana kakano; ti kitekite e Atua *ki ai* kua mitaki.

22 Ti fakamonuina atu ai he Atua, kua pehe atu, Kia fanau ā mo e fakaloga, kia puke ai foki e tahi; kia fakaloga foki e tau manu lele ke he kekeleke.

23 Ko e afiafi mo e pogipogi ko e aho lima haia.

24 ¶ Ne pehe mai e Atua, Kia tutupu mai e tau mena momoui mai he kekeleke, takitaha mo e hana kakano, ko e tau manu huifa he kaina mo e tau mena totolo, mo e tau manu huifa he vao, takitaha mo e hana kakano; ti pihia ni.

25 Ne eke foki he Atua e tau manu huifa he vao, takitaha mo e hana kakano, mo e tau manu huifa he kaina, takitaha mo e hana kakano, katoa mo e tau mena oti kua totolo ke he kekeleke, takitaha mo e hana kakano; ti kitekite e Atua *ki ai* kua mitaki.

26 ¶ Ti pehe age ai e Atua, Kia eke e tautolu e tagata ke he ha tautolu a fakatai, ke tuga a tautolu; kia pule foki a lautolu ke he tau ika he tahi, mo e tau manu lele he pulagi, mo e tau manu huifa, mo e kekeleke oti kana, katoa mo e tau mena totolo oti kua totolo ke he kekeleke.

27 Ti eke ai he Atua e tagata ke he hana

fakatai, ko e fakatai he Atua ne eke ai e ia; ne eke e ia a laua ko e tane mo e fifine.

28 Kua fakamonuina foki he Atua a laua, mo e pehe atu e Atua kia laua, Kia fanau a mo e fakatokologa, kia fakapuke foki e lalolagi, mo e kautu ki ai; kia pule foki ke he tau ika he tahi, mo e tau manu lele he pulagi, katoa mo e tau mena momoui oti kua totolo ke he kelekele.

29 ¶ Ti pehe age e Atua, Kitiala, kua foaki atu e au kia mua e tau akau ikiiki oti kua tutupu mo e ha lautolu a tau fua ha he fuga kelekele oti kana, katoa mo e tau akau oti ha i ai e fua he akau kua tupu mo e hana tega; ma mua ni ke eke mo mena kai.

30 Ko e tau manu huifa oti foki he kelekele, mo e tau manu lele oti he pulagi, katoa mo e tau mena oti kua totolo ke he kelekele, ha ha i ai e moui, kua foaki atu e au ki ai e tau akau ikiiki oti lau mukamuka ke eke mo mena kai; ti pihia ni.

31 Ti kitekite e Atua ke he tau mena oti ne eke e ia, kitiala, kua mitaki lahi ni. Ko e afiafi mo e pogipogi ko e aho ono ia.

#### KO E VEVEHEAGA II.

*Ko e aho tapu jakamua; ko e tauteaga a Etena; ko e tala ke he fifine uluaki.*

**K**UA oti kana he eke e lagi mo e lalolagi katoa mo e tau mena oti ha i ai.

2 Kua fakaoti he Atua ke he aho fitu hana gahua ne eke e ia; ko e aho fitu foki ne okioki ai a ia he hana tau gahua oti ne eke e ia.

3 Ti fakamonuina ai he Atua e aho fitu, mo e fakatapu ai; ha kua okioki ai a ia he hana tau gahua oti kana he Atua ne eke e ia.

4 ¶ Ko e tala hanai he lagi mo e lalolagi ke he ekeaga ke he aho ne eke ai e Iehova ko e Atua e lalolagi mo e lagi,

5 Mo e tau vao ikiiki oti kana he fonua ka e nakai la ha he kelekele, katoa mo e tau akau ikiiki oti he fonua ka e nakai la tutupu; ha kua nakai la fakato hifo e Iehova ko e Atua e uha ke he kelekele, ti nakai fai tagata foki ke gahua ke he fonua.

6 Ka kua hake e hahau he kelekele, kua fakamalu ai e fuga kelekele oti kana.

7 Ti eke ai e Iehova ko e Atua e tagata ke he cfufu he kelekele, ti fafagu ke he hana tau poko ihu e fafagu he moui; ti kua eke tuai a ia mo tagata moui.

8 ¶ Ne to foki e Iehova ko e Atua e kaina i Etena ke he fahi uta; ti tuku ai e ia e tagata ne eke e ia.

9 Ne fakatapu foki e Iehova ko e Atua ke he fonua e tau akau oti kua fulufuluola he kitekite, mo e mitaki ke kai; ko e akau he moui foki ke he vaha loto he kaina, mo e akau ke iloa ai e mitaki mo e kelea.

10 Ne lele atu foki e vailele mai Etena ke fakamalu aki e kaina, ti vevehe kelekehe ai, kua eke mo tau la ne fa.

11 Ko e higoa he taha ko Pisona ia; ko ia ne takai e motu oti ko Havila, ha i ai e auro;

12 Kua mitaki ni e auro he motu ia; ha i ai e petala mo e soama.

13 Ko e higoa foki he vailele ua ko Kihona ia; ko ia ne takai e motu oti ko Aitiopie.

14 Ko e higoa foki he vailele tolu ko Hitekelu ia; ko ia ne lele ke he fahi uta a Asuria. Ko e vailele ko Eufirate haia.

15 Ne uta foki e Iehova ko e Atua e tagata, mo e tuku a ia ke he kaina ko Etena, ke gahua ai mo e leoleo ai.

16 Ne tala age foki e Iehova ko e Atua ke he tagata, kua pehe age, Ko e tau akau oti kana ha he kaina ke kai ai ni e koe.

17 Ka ko e akau ke iloa ai e mitaki mo e kelea, aua neke kai ai e koe; ha ko e aho ka kai ai e koe to mate ai ni a koe.

18 ¶ Ne pehe mai a Iehova ko e Atua, Kua nakai mitaki ke tokotaha e tagata; to eke e au mana e lagomatai ke lata mo ia.

19 Ne eke e Iehova ko e Atua ke he kelekele e tau manu huifa oti he kelekele, mo e tau manu lele oti he pulagi; ne ta mai e ia kia Atamu ke kitia po ke fakahigoa ha ha e ia; ko e higoa ne ui e Atamu ke he tau mena momoui oti ko e hana higoa haia.

20 Ti ui ai e Atamu e tau higoa he tau manu huifa oti he kaina, mo e tau manu lele he pulagi, katoa mo e tau manu huifa oti he vao; ka ko Atamu nakai moua ha lagomatai ke lata mo ia.

21 Ne fakapulumohea e Iehova ko e Atua a Atamu ti mohe ni a ia; ti uta ai e ia e taha hui kahokaho hana, ti fakakati e ia e kakano ke kukui aki.

22 Ko e hui kahokaho foki ne uta e Iehova ko e Atua ia Atamu ne eke aki e ia e fifine; ti ta mai ai e ia kia Atamu.

23 Ti pehe ai a Atamu, Ko e hui ni hanai he haku hui, mo e kakano he haku kakano; to ui a ia ko e fifine, ha ko e mena uta a ia mai he tane.

24 Ko e mena ia ke toka ai he tane hana matua tane mo e hana matua fifine, ka e pipiki ke he hana hoana; ti eke ai a laua mo tino taha.

25 Nakai felevehi ni a laua ko Atamu mo e hana hoana, ti nakai mā a laua.

#### KO E VEVEHEAGA III.

*Ko e veliaga a Atamu.*

**N**E mua he loto matala he gata ke he tau manu oti he kelekele ne eke e Iehova ko e Atua. Ne pehe mai a ia ke he fifine, Ko e moli kia kua pehe mai e Atua, aua neke kai e mua ke he tau akau oti he kaina?

2 Ti pehe atu ai e fifine ke he gata, Mena kai e maua e tau fua he tau akau he kaina.

3 Ka ko e fua he akau ha he vaha loto he kaina, ne pehe mai e Atua, Aua neke kai ai e maua, po ke pipiki a maua ki ai, neke mamate a maua.

## KENESE IV.

4 Ti pehe mai ai e gata ke he fifine, Nakai ni mamate a mua;

5 Ha kua fioia he Atua ko e aho ka kai ai e mua, ti fakaafa ai ha mua a tau mata; ti eke ai ni a mua ke tuga ne tau atua ke iloa ai e mitaki mo e kelea.

6 Ne kitia he fifine ko e akau mitaki ni ke kai, mo e fulufuluola mai, ti ko e akau aoga foki ke moua ai e iloilo, ti toto ai e ia ke he fua he akau mo e kai ai; ne age foki ke he hana tane ne fakalataha mo ia, ti kai ai foki e ia.

7 Ti fakaala ai e tau mata ha laua tokoua, ti iloa ai e laua kua nakai felevehi a laua; ti tui ai e laua e tau lau mati ke eke mo titi ma laua.

8 Na logona e laua e leo a Iehova ko e Atua ha ne haele fano ke he kaina ke he magaaho hauhau; ti fakamumuli ai a Atamu mo e hana hoana mai mua a Iehova ko e Atua ki tua he tau akau he kaina.

9 Ti ui ai a Iehova ko e Atua kia Atamu, kua pehe mai kia ia, Ko fe a koe?

10 Ti pehe atu ai a ia, Ne logona e au hau a leo ke he kaina, ti matakutaku ai au, he nakai felevehi au; ti fakamumuli na au.

11 Ti pehe mai a ia, Tala atu e hai kia koe kua nakai felevehi a koe? Kua kai kia e koe e akau ne poaki atu ai au kia koe, aua neke kai ai e koe?

12 Ti pehe atu ai a Atamu, Ko e fifine ne ta mai e koe ke fakalataha mo au, ne ta mai e ia e fua akau kia au, ti kai ai e au.

13 Kua pehe mai a Iehova ko e Atua ke he fifine. Ko heigoa e mena nai kua eke e koe? Ti pehe atu ai e fifine, Ne fakavai mai he gata au, ti kai e au.

14 Ti pehe mai ai a Iehova ko e Atua ke he gata, Ha kua eke e koe e mena nai, ko e mena ia ke mua ai hau a malaia ke he tau manu huifa oti he kaina, katoa mo e tau manu huifa oti he vao; to totolo a koe ke he manava hau, mo e kai efuefu e koe ke he tau aho oti he moui hau;

15 To fakatupu e au e faitaua kia mua mo e fifine, ko e hau a fanau foki mo e hana fanau; to tatuki e ia hau a ulu, ka e tatuki ni e koe hana muihui.

16 Ne pehe atu a ia ke he fifine, To fakalahi ni e au hau a mamahi, ko e mamahi he hau a fatu; to fanau mai e koe e tau tama mo e mamahi; ka e hagao atu hau a manako ke he tane hau, to pule foki a ia kia koe.

17 Na pehe mai foki a ia kia Atamu, Ha kua fanogonogo a koe ke he kupu he hoana hau, mo e kai e koe e fua he akau ne poaki atu ai au kia koe, ne pehe atu, aua neke kai ai e koe; ko e mena ia ni kua malaia ai e kelekele ha ko koe; to kai ai e koe mo e mamahi ke he tau aho oti he moui hau;

18 To tutupu mai ai māu e tau akau tala-tala, mo e mahukihuki; to kai foki e koe e tau akau ikiiki he fonua.

19 To kai foki e koe hau a mena kai mo e kavakava he hau a mata, ato liu a koe ke he kelekele; ha ko e mena eke mai ai a koe; ha ko e efuefu ni a koe, to liu foki a koe ke he efuefu.

20 Ne ui e Atamu e higoa he hana hoana, ko Eva; ha ko e matua fifine a ia he tau tagata momoui oti kana.

21 Ne eke foki e Iehova ko e Atua e tau tapulu kili manu ma Atamu mo e hoana hana, me e fakatapulu ai a laua.

22 ¶ Ne pehe age foki a Iehova ko e Atua, Kitiala, kua eke tuai e tagata ke tuga ne taha ha tautolu ke iloa ai e mitaki mo e kelea; ko e hanai, neke fakaalo atu hana lima, mo e toto e fua he akau he moui, ti kai ai, mo e moui tukulagi;

23 Ti vega ai a ia e Iehova ko e Atua he kaina ko Etena, kia gahua ke he kelekele ne eke mai ai a ia.

24 Ti vega kehe ai e ia a Atamu; ne fekau atu foki e ia e tau kerupi ke nonofo ke he fahi tokelau he kaina ko Etena, mo e pelu puho-puho, kua tafeliuaki ke leoleo aki e hala ke he akau he moui.

THE HOLY BIBLE IN NIUE

63

Published by The Bible Society

in the South Pacific

P.O. Box 5173, Raiwaqa,

SUVA, FIJI

BSSP-1983-1M

ISBN 0 564 00077 9